

# „Wäntele“ Info !



Ussgoob 4 / 2011

Basel, aafangs Dezämber 2011

Adie zämme

S isch umme, s Hammerjoor 2011! S isch e woori Fraid gsi, waas mr in dämm Joor alles hänn derfen erlääbe:

S Drummlebummle in dr Bööööögestadt Ziiri, drnoo d Basel Tattoo Parade mit emene saugete Uffdritt, s Gwürztraminerfescht bi den Elsässer in Berghaim, dr Daag vo de Basler Stadtdoor, wo me s erscht Mool vom Dalbedoor abgloffen und au vom Regierigsroot Wessels begriesst worden sich, Ribeauvillé mit em Pfifferdaj, wo me hitte fascht kaa saage, s isch d Elsässer „Street Parade“ gmischt mit Määl, denne s erscht Mool in Minche am Trachtenumzuug, wo s laider nur gsaicht het wie uss Kiibel, drnoo bi herrligem Sunneschynn am 60te Winzerfescht in Döttige und zem Schluss s absolut <Highlight>, s Druubefescht bi den Italiääner in Meran!

Zem Jooresabschluss denne non e saugmietlig Zumpftässe, organisiert vom Voordraab; au doon e Novum; emool ooni Drummle und Piccolo!

Wäntele – Härz waas wotsch no mee.....

## Uss em Zumpftroot

Well s im Zumpftroot en Änderig gää het – d Maja Breisinger isch vom Zumpftroot zuggdrätte – isch dr Zumpftroot in dr neije Bsetzig glyyn emool zämme koo und het d Böschte und d Ärbetli vrdailt. Dr neij Zumpftroot gseet jetzen esoo uss:

Fred Wagner	Zumpftmaischter
André Stohler	Statthalter + Dambuurmaioor
Doris Rohner	Seggelmaischtere

die Drey sinn esoo au vo dr Zumpftversammlig gwäält worde.

Esther Trachsel	Schryybere
Doris Walser	Byysitzere + verantwortlig fir d Goschdym + s Material
Marcel Wegmann	Byysitzer + verantwortlig fir s Marketing, d Wärbig + fir neiji Kandidaate
Stephie Wagner	Byysitzere + verantwortlig fir d Raiseorganisatioon, d Homepage + s Facebook

Waas haisst daas jetze:

Bi dr **Esther** isch jo alles klar, sii duet d Protokoll schryyben und isch au fir die andere Schryybaarbete verantwortlig. Dää Job als Schryybere het d Esther uff Eewig..... 😊

**S Walsi** luegt, ass d Goschdym und s Material allewyyl imene guete Zuestand sinn und ass neiji Wäntemitglieder zemene Goschdym kemme. S wird aaber nit esoo vrstande, ass s Walsi naaie, wäsche, glette ooder rainige duet! Fir s Naaie hänn mr e Schnyidere und fir s Wäsche, Glette und Rainige isch ejeede(s) sälber verantwortlig!

**Dr Marcel** isch neij fir s Marketing und fir d Wärbig zueständig, daas haisst, ass äär Veranstalter duet aaschryybe ooder zem Byspiil au d Wärbedrummle bi dr Basler Behörde duet aadryybe. Waas die neije Kandidaate aagoot, blybt no alles bim Glyyche; dr Marcel duet no allewyyl fir die neije Kandidaate „d Gluggere“ spiile!

**D Stephe** isch als neij Zumpftrootmitgliid fir d Raise verantwortlig. Si duet luege, ass dr Bus rächtzytig doo isch ooder mit wellelem Zug me duet verraise; au luegt d Stephe, ass mr allewyl e gueti Unterkumpft und gnueg z ässe und z dringge hänn, wenn mr mee Dääg verraise dien. Au duet d Stephe im Raame vom Meeglige wyter d Homepage + s Facebook pflääge!

## **Aktuell**

Noonere langen und aggdyyve Zyt als „Wäntele“ und au als Zumpftreetene, isch d Maja Breisinger uff d Zumpftversammlig 2011 als Aggdyyvmitgliid zruggrätte. Fir iiri Verdienscht isch d Maja an dr Zumpftversammlig zem Eeremitgliid ernennt worde.

Mr gratulieren alli rächt härzlig und wintschen alles Gueti und gueti Gsundhait!

## **Ussicht**

Scho isch der Zumpftroot draa, s 2012 z gschtalten und z organisiere:

- Am Frytig, 13. Abrille isch s Drummlebummle in Ziiri.
- Vom 15. bis zem 17. Juni isch s Oberwalliser Dambuurefescht in Zermatt.
- Am Samschtig, 21. Juli isch d Basel Tattoo Parade, mr hoffen as mr au wiider drbyy sinn.
- Am Samschtig, 18 Augschte isch dr traditionell Daag vo de Basler Stadtdoor
- Am Sunntig, 2. Sebämber isch Pfifferdaj in Ribeuavillé. Mr luege, ob mr wiider drbyy sinn.

Die andere Daate, wie lebigsstunde und wyteri „Events“ bikemme dr mit dr Wienachtsboscht zuegstellt.

Gits fir s näggscht Joor wiider liberraschige was Yyloadige aagoot, dien mr daas au im neije Joor per Email mitdaile!

## **Ruggbligg + Danggscheen vvylmool**

S isch wie in dr Yylaitig scho gschriibe, e gwaltig Joor mit gueten und seer gueten Uffdrift und Engagements gsii. Allne, wo zem guete Groote byydrait hänn, doo vom Zumpftroot dr beschti Danggl

\*\*\*\*\*



So daas wäärs gsii! Mr wintschen allne „Wäntele“ e wunderscheeni Adväntszyt, bsinnligi Feschtdääg und e guete Rutsch ins neije Joor! Blyybed gsund und hänn's Guet zämme.

Adie bis zem näggschte Mool!

Dr Zumpftroot vo de Basler Källerwäntele Zumpft